

Schiticchi e pinitenzi

Quannu lu cristianesimu vinciu,
mittennu fini a lu cultu paganu,
lu sciacchitanu assai ni suffriu,
picchè 'un ci rispiacia ddu munnu stranu,
ddi rriti a la natura collegati,
fatti di baccanali e scampagnati.

'N agnidduzzu a Diana cacciatrici,
'na libagioni ricca pi Minerva,
e cu la scusa di li sacrifici,
finia sempri a schiticchiu mmezzu all'erva.
Di tannu in poi, festi e riligioni
ccà fannu rima cu costipazioni.

Pi manciari nun mancanu occasioni,
ogni simana c'è 'na ricorrenza:
festi civili, santi in prucissioni,
soffri sulu cu havi inappetenzza.
Pi ghiunta semu attenti a lu dittatu
e pi ogni festa c'è un piattu appropriatu.

Cu l'almanaccu appena spignatu,
già princiamu li divertimenti;
ognunu sonna un annu furtunatu,
chinu di gioi e senza patimenti.
Ma si lu voi cchiù riccu e cchiù massaru,
nun scurdari lenticchi e baccalaru.

Scausu, devotu, a diunu e mutu,
'n coddu 'na 'ntoccia di mezzu cantaru,
nun c'è cristianu chi nun fa lu 'utu
a la Maronna lu primu di frivaru;
cu prea cu fidi e addumanna la grazia,
cu già la riciviu e La ringrazia.

Lu iornu appressu è ancora festa 'ranni,
cunnucemu la Matri chi ni vadda;
la marina si n'acchiana canni canni
ch'avi l'anuri di purtalla a spada.
Puru l'arma cchiù misira e cchiù dura,
virennula senti l'abbuttatura.

Ma dura picca la commozioni,
picchì ni piaci puru lu scialari
e nun ni manca certu l'occasioni,
avvicinannusi cannalivari.
Damu sfou accusi a la cuntintizza,
esagerannu a chiacchiari e sasizza.

In Quaresima semu l'unnumani,
iornu di orazioni e pintimentu.
A Siacca semu boni cristiani,
e nun ni piaci lu spuniamentu;
perciò, pigghiamu la carni arristata
e ci 'ntrummam n'otra schiticchiata.

Pi San Giuseppi, è usanza affermata
a S. Micheli comu a lu quarteri
preparari 'na ricca taulata
chi si la sonna lu megghiu cavaleri.
Lu cchiù riccu manciari mai pinsatu
supra dda taula è prisintatu.

Li mmitati, cu l'occhi sbarrachiati,
sirvuti comu principi e regnanti,
sunnu li puureddi sfurtunati
chi p'un gnornu si scordanu li stenti.
Però, lu cori si strinci a pinsari
chi di rumani un annu hannu 'aspittari.

Lu frumentu aggigghiatu, arummiratu,
'ntrizzatu a cruci 'nta lu laureddu,
dintru li chiesi cu cura cunzatu,
ni rici chi la Pasqua è già a purteddu.
Tutti riunamu lu venniri e santu,
emu a la cruci e dda finisci a chiantu.

'Ngustiati, ni sapemu cunsulari,
sapemu rari mmestu a li pinseri:
ova, farina e subito a 'mpastari,
pi fari pignulata e cannileri.
Dopu lu 'ncontru l'arma s'arrisetta,
e a 'na tirata fa Pasqua e Pasquetta.

Ni pigghia arora la malincunia
e addiventa 'rausu a suppurtari
quannu la Pasqua cari primintia.
Un misi chinu, chinu a travagghiari!
Poi viri rissu: la liberazioni!
E nun ti perdi certu l'occasioni.

Tutti in campagna 'ranni e picciliddi.
Lu sulì già chi principia a quariari:
cu cogghi nespuli, cu favi viddi,
cu cerca mennuli di scunnicchiari.
Tra li troffi di maiu e paparina
c'è già la prima seppi chi camina.

Lu primu maiu si torna a campagnata:
pani, caccocciuli e sardi 'nta li sporti.
L'anzianu pensa a l'ebbica passata,
quannu 'nciurati eranu li porti
cu manati di maiu e cu curuni,
pi bona sorti e...qualchi sciddicuni.

Risuddi sicchi e pupi di pagghia,
vampati tanti di fari 'mprissioni
cu 'na fumata chi 'nta l'aria quagghia,
ni ricinu ch'è già l'Ascensioni.
Viva la santa Sceusa! E satamu;
e macari, satannu, n'abbruciamu.

E' festa tanta pi omini e armali:
si, picchè puru becchi e picureddi,
scechi e vistiola dunanu un signali,
vistennusi cu scocchi e ciancianeddi.
Certu però, datu lu gaudiu magnu,
ci avissiru pututu fari un bagnu!

Dda supra la muntagna chi fumia,
tra maggiu e giugnu San Caloriu chiama;
lu sciacchitanu si metti a la via,
picchè lu prutitturi soi ama.
Metti a filagnu machini e mutura
chi prima d'arrivarici ci scura.

Autri tempi quannu d'ammatina,
viola viola e c'un preu tantu,
'mpapariddatu e cu la ciatatina,
assummava a li peri di lu santu.
A Iddu ognunu s'arraccumannava
e un ciuri di inestra ci purtava.

A viaggiu fattu e la cuscenza a postu,
di cursa poi si ni ia sutta li pini,
p'accaparrarisi lu megghiu postu
e dava funnu a li sporti chini.
Tra quattr'aruli chiusi cu li cutri,
la panza si inchia quantu un utri.

Comu un vecchiu patruni di paranza,
a prua, a l'additta, facci a lu ventu,
San Petru pi lu mari soi avanza
e ci va appressu un populu cuntentu.
'Ntantu lu ciauru di lu pisci frittu
ti pigghia in testa e ti apri lu pitittu.

Lu zu 'Ntoni di mari scumpatenti
un giru cu la varca vosi fari;
la passata era ancora a nenti
e lu stomacu si 'ntisi trubbulari.
A la murata di cussa s'affacciau,
apriu la vacca e 'a cascia ci vulau.

Cu si ni va in campagna a villeggiari
e sutta li carrubbi s'arriccia,
cu, accannatu, si va ietta a mari,
ma tutti a lugliu chiuremu putia.
Tra un ave, un amen e un dominu vobiscu
puru li santi restanu a lu friscu.

Ogni primu d'austu pensu a quannu
chi appi fora r'ora dda pinsata
di farimi zitu e me' nannu:
"ricordati, la zita va spignata!
Pigghia un carrettu di muluna d'acqua
e ogni malauriu ti lu stracqua".

Bona finiu! Foru li muluna?
Ma di quannu st'usanza si pirdiu,
pi tanti matrimoni 'un c'è fortuna:
la festa a du' tri misi già spiddiu.
Perciò d'ora in avanti 'un v'u scurdati,
chi costanu cchiù cari l'avvocati.

Settemmiru è già quasi finutu
e mmezzu a li putii c'è muvimentu;
un quarteri pi un annu addurmisciutu,
ddu iornu pari chi nunn'avi abentu.
Sciaveriu chiama a corpi di campani
di rintra li cuttigghi li viddani.

Gesu, chi misi bruttu, pestucata!
Lu pinseri d'ottuviru sdisola;
nun c'è mancu 'na festa cumannata,
poi, pi cucucciu, principia la scola!
Comu si fa a passari sta nuttata?
Chi ni riciti di 'na schiticchiata?

Arrifrisca lu tempu, simmulia,
si senti di castagni un ciauru forti;
lu pasticceri travagghia cu maistria
pi prepararli li cosi di morti:
pupi di zuccaru e marturana
chi a talialli l'occhiu s'alliana.

“Va itivi a curcari chi li morti
su iunti già a la porta Palermu”
L'abbanniaturi già lanciau lu bannu
e nun si viri cchiù un picciottu a smannu.
Ognunu stu dittatu havi a seguiri,
si riala di li morti voli aviri.

Sutta li cuttunini finta fannu
di dormiri già tutti a sonnu nchinu;
vulissiru canusciri lu nannu,
virillu p'un mumentu di vicinu.
Ma pi lu sonnu già la testa appuzza,
dicennu 'na priera pi dd'armuzza.

Nun sugnu nicu, sugnu attimpateddu,
ma a li morti, lu vogghiu cunfissari,
mi curcu prestu, l'aricchi mpinneddu,
facennu finta di runfuliari.
L'occhi a la porta, 'ngattatu, ad aspittari,
pi sentirli a me patri ranciuliari.

L'unnici di novembri è S. Martinu,
chiddu di lu mantellu, 'u cavaleri
chi ni rici chi già lu mustu è vinu
e va sazzatu lu primu biccheri.
Ma a panza leggìa versu sutta spinci;
fu p'assuppari chi 'mmintamu i sfinci.

'N autru annu ni stamu scucciannu
e la partenza è giustu salutaru,
anchi picchè nun fu poi tantu strammu,
puru si tutti 'un potti accuntintari.
Cuminciamu perciò la maschiata
l'ottu dicembri cu la 'Mmaculata.

La sira già si principia a iucari
cu li parenti stritti e li vicini;
la matri 'ranni, mmeci di tirari,
pensa a Natali e a li cosi chini.
Ma prima ancora c'è Santa Lucia
e iornu tririci fa la cuccia.

Frummentu e ciciri vennu munnati,
'mmiscati, misi a moddu, poi 'udduti;
cu vinu cottu e zuccaru cunzati,
pi divozioni a taula sirvuti.
Ddu iornu nun si tocca pasta e pani,
si l'occhi vo' savaritilli sani.

Farina, zuccaru e ficu sicchi,
ammuneca e mennuli pistati,
saimi, mandarini e diavulicchi;
è la ricetta di li cucciddati.
"Abbunnati però l'avemu a fari!
'Nca, me cummari è a luttu, 'un ci l'ha" dari?

'Nturnu a li scannatura attinticati,
cu 'mpasta, cu caddia, cu pizzata,
cu arrimina li ficu macinati
e si licca lu itu e cu camia.
Lu ventu fora rufulia forti
e trasi di li 'ngagghi di li porti.

Ma nun fa friddu si si' 'n cumpagnia;
c'è l'anficedda ruci di lu furnu
e c'è l'affettu chi da caluria
di cu ti voli beni e ti sta 'nturnu.
Li picciotti assittati a 'u bancareddu
ucianu iucannu a minicheddu.

Cu sti festi e l'autri chi 'un vi dissi
lu sciacchitanu nun si po' annoiari.
Quannu 'un ci su' schiticchi, ci su' missi,
quannu 'un diuna, un porcu havi scannari.
Si, picchè ccà ognunu havi crianza:
l'anima cura, ma nun la scorda 'a panza.

Nino Pumilia 2003